

differunt. A Christo equidem Ecclesiae Ministerio aedificatio & consummatio corporis sui, quod est Ecclesia, commissa est, modus tamen, quo fieri illud debeat, in libertate Ministri est relictus. Cumque is modus, qui scripto fit, & accuratior plerumque sit, quippe ex solidiore meditatione proveniens, & in plures sese facilius diffundat & denique diutius perennet, quam, quem loquela tantum repraesentat, cum maxime decere Academiae doctorem, qui plurimis docendis destinatus est, ex se intelligitur. Ex quibus sole meridiano clarius est, quanquam sacrarum literarum lectio omnibus scriptis Theologicis summo jure praefenda sit, non tamen ita commendari debere aut posse, ut ideo illa ex manibus studiosorum plane excutiantur, sed è contra ita laudandam esse S. literarum lectionem, ut cum ea conjungi debere, si fructuosa esse debeat & felices successus habere, Theologorum scriptorum, utpote expositionum S. Scripturae, Compendiorum & Systematum Theologiae, Disputationum cum adversariis, certaminum Ecclesiae aliorumque id genus lectionem, nullatenus sit inficiandum.

§. IX. Deinde perpendendum nobis est, quicquid nobilitatis & excellentiae S. Scripturae competit, id vim suam non nisi intra certum ordinem exerere. Nec enim vel vi quadam absoluta Scripturae verba significant, sed necesse est, ut legendi facultatem habeas, si intelligere verba velis; vel eadem illa vi intellectum ad assentiendum & voluntatem ad amplectendum commovent, sed necessum est, ut ex verbis intellectis rem ipsam scil. doctrinam, per verba notatam, mente recondas, mysteriorum majestatem admireris, sanctitatem, à te requisitam, quasi degustes, id est, rerum revelatarum veritatem, bonita-